

Augustin Hendry

27.01.1933 - 24.01.2003



Augustin Hendry ei naschius ils 27 da schaner 1933 sco emprem affon da Bruno e Barla Catrina Hendry-Riedi. El ei carschius si cun quater soras e treis frars. A Sedrun ha el frequentau la scola primara e secundara. La stad passentava el si l'alp sco caver e lu pli tard sco paster. Quei era in stentus temps per el.

Suenter il temps da scola fa el igl emprendissadi da miradur tier la firma Murer SA. Dus onns pli tard frequenta el la scola da polier a Sogn

Gagl. Denteren lavura el sco instructor alla scola da poliers a Sursee. El ei denton vinavon engaschus tier la firma Murers SA al plaz da construcziun «Grande Dixence» a Zermatt ensemen cun aunc auters Tujetschins. Quei ei stau per el in tut special temps.

Augustin leva denton sescolar vinavon. Aschia banduna el Zermatt ed entra ils 1 d'avrel 1959 tier la firma Bau AG Erstfeld/Andermatt. Leu empren el era d'enconuscher sia dunna.

Igl onn 1962 ei stau per el in onn plein eveniments. Augustin acquista il diplom sco menader da construcziun ad Argovia ed il diplom federal da meister miradur. Tuts attestats ed examens cun excellentas notas. Tier la firma Bau AG lavura el 33 onns. El era acziunari, ella direcziun da fatschenta activamein engaschus e menava la filiala ad Andermatt. Tier la realisaziun da differents gronds baghetgs eis el staus alla testa, per exempel per il departament federal da militar, pil cantun Uri, al tunnel dil Gotthard eav. El liquidava tuttas lavurs sco meister da construcziun cun grond success, naven d'offertas entochen tier il rendaquen.

Igl onn 1962, ils 24 d'avrel marida el sia dunna Theres Arnold ella baselgia parochiala a Sedrun. Ord la lètg neschan dus affons, la Kathy ed il Kurt. Treis onns pli tard baghegia el ad Erstfeld sia atgna casa.

Cun la Val Tujetsch ha Augustin adina giu bien contact. Igl onn 1968 ha el cumprau a Milez ina tegia da mises. El ha investau bia temps liber per la restauraziun dalla tegia ed il nuegl.

Duront ils diesch onns da sia pensiun ha Augustin saviu guder e selegrar da ses dus beadis. Duront il temps da stad veseva ins el stedi a Milez. Far lenna era per el la pli biala occupaziun. La sera serendeva el savens a Sedrun per beiber in migiel vin e dar ina paterlada cun ses parents ed enconuschents.

Ussa haveva el finalmein era peda per viadis. Treis gadas ha el fatg vacanzas a Hawaii. Ils meins d'unviern passentava el a Tailanda, in tiara ch'el carezava fetg. Era Malaisia, Singapor e Burma ha el visitau.

Fin fevrer 2002 ei igl Augustin sgulaus per la davosa gada da Bangkok a Turitg. La stad vargada han las forzas schau suenter ed el ha sentiu che siu temps ei spiraus. Il november ha el stuiu suttametter al tractamend dil spital ed ha buca pli saviu turnar a casa. Ils 24 da schaner 2003, treis dis avon siu 70avel anniversari eis el morts ella consequenza da sia malsogna. Aschia ei ina veta luvrusa ida alla fin.

Tes cars